

AEK-REN AUZIA. Entzutegi Nazionaleko laugarren sekzioak AEKren helegitea aztertu du

Garzonek ezarritako administrazio judiziala ezeztatze eskatu du AEK-k

Epailleak leporatutako ETArekiko lotura egiaztatu gabe dagoela argudiatu du defentsak

Pello Urzelai | DONOSTIA

Baltasar Garzon epaile instruktoreak iazko azaroaren 22an AEKri ezarritako administrazio judizialari aurkeztutako helegitea aztertu zuen atzo Entzutegi Nazionaleko Penal Arloko laugarren sekzioak. AEKren izenean, Felix Cañada abokatuak administrazio judiziala ezartzen duen erabakia ezeztatze eskatu zuen. Fiskala, ordea, AEKren kontra ezarritako badaezpadako neurriei eustearen alde agertu zen. Bista itxia izan zen, eta epaimahaiak egun edo aste batzuen buruan erabakiko du helegitea haintzat hartu edo ez.

Garzonek iazko azaroaren 22ko autoan AEKren kontra ezarritako administrazio judizialak zilegitasunik ez duela argudiatu zuen euskalduntze eta alfabetatzerako erakundearen abokatuak, ordu eta erdi iraun zuen hitzaldian. Batetik, instruktoreak aipatzen dituen agirietan AEK eta ETA edo KASen arteko loturarik ez delako agertu. Bestetik, badaezpadako neurriak hartzeko Garzonek aipatutako euskarri legala —1969ko dekretu bat— oker erabilita dagoelako. Azkenik, Auzipetze Zibilaren Legearen irizpideak betetzen ez direlako.

Lehen argudioari dagokionez, administrazio judiziala ezartzeko neurria hartu ahal izateko talde armatu batekiko lotura agertzea beharrezkoa dela, eta hori Garzonek aipatutako frogak eta agirietan ez dela egiaztatu argudiatu zuen Felix Cañada abokatuak, EGUNKARIA-ri azaldu zionez. Agiriz agiri aritu zen atzo Entzutegi Nazionaleko epaimahaiaren aurrean horrelako loturarik ez dagoela erakusteko. Adibidez, epaile instruktoreak aipatzen duen *Udaletxe proiektuarekin* AEKk zerikusirik ez duela nabarmendu zuen Cañada abokatuak. «Ez dago datu bat ere esateko AEKk parte ahal izan duenik proiektu horretan. Ezinezkoa da, AEKren izenean parte ahal izateko estatutuen arabera bere erabakiguneez izendatu behar zutelako, eta horrelakorik gertatu ez delako», azaldu zuen abokatuak. Garzonek iazko azaroko auto hartan aipatutako beste zenbait agiriren kasuan ezinezko diren ondorioak ateratzen dituela argudiatu du AEKko abokatuak. «Klabe



AEK-ko arduradunek iazko azaroan eskaini zuten prentsurrekoa, Garzonen autoa salatzeke.

sekretuei buruzko agirian, adibidez, kontrako ondorioa antzematen da, hots, AEKk ez duela zerikusirik KASekin. Garzonek egiten dituen interpretazioak «logikatik aldendu egiten dira», Felix Cañada abokatuaren ustez.

Garzonek erabilitako euskarri legalei dagokionez, AEKri administrazio judiziala ezartzeko 1969ko legeak eskatutako baldintzak ez direla betetzen uste du abokatuak. Horrez gain, Auzipetze Zibilaren Legeak badaezpada-

ko neurriei buruz ezartzen dituen irizpideak ere ez direla aintzat hartu argudiatu zuen. Lege honek dio neurri horiek

FELIX CAÑADA

AEKren abokatuak

«Garzonek agiriei buruz egiten dituen interpretazioak logikatik aldentzen dira»

«ahalik eta arine-nak eta kalte gutxien egiten dutenak» izan behar dutela. Administrazio judiziala ezartzea baino neurri arinagoak —kontrol judiziala, adibidez— badaudela uste du AEKren abo-

katuak.

Atzoko saioaren aztergai bakarra administrazio judizialaren zilegitasuna izan zen,

iazko azaroko auto horretan helegiteko gai bakarra zelako. Auto hartan ez zegoen inoren kontrako inculpaziorik, pertsona batzuk deklaratzeko deia besterik ez zegoen. Are gehiago, auzi honetan ez dago auzipetzerik edo inculpaziorik —gehienak AEKrekin lotutakoak, bakarrik deklaratzera deitu zituen—.

Fiskala, berriz, administrazio judizialari eustearen alde agertu zen. AEK ETArekin Udaletxe proiektuaren barruan dagoela eta inputatu gisa deklaratu zuen pertsona bat —Juan Mari Mendizabal— Ekin auziaren barruan espetxean dagoela argudiatu zuen fiskalak.

AUZIA

Zazpi hilabete

Garzon epaileak iazko azaroaren 22an plazaratutako autoan AEKren kontrako neurri batzuk hartu zituen (administrazio judiziala ezarri eta ondasunen bahiketa agindu), eta 19 lagun inputatu gisa deklaratzera deitu zituen ETAKo kide izateaz edo hari laguntza emateaz akusatuta.

Gainera, Gizarte Segurantzari eta Ogasunari 1.150 milioi pezetako iruzurra egitea leporatu zien AEKri eta Galgarkari. Horrez gain, erakundeon administrazio judiziala ezarri zuen.

Hurrengo astean Garzonek autoan aipatutako hemeretzi lagunek bere aurrean deklaratu zuten, eta aske geratu ziren guztiak, haien kon-

tra inolako neurririk hartu gabe eta inolako auzipetzerik gabe. Hala, AEK-k «euskararen eta euskal irakaskuntzaren kontrako gurutzadaren barnean» kokatu zuen Garzonen jokabidea, eta prozesuan jasaten ari ziren berme juridiko falta salatu zuen.

Maiatzaren 26an AEK-ko kideak prentsurrekoan agertu ziren, elkarteak kriminalizatzeko saioan porrot egin ondoren, Garzonen asmoa berau ekonomikoki itotzea zela adieraziz. Ordurako, Bizkaiko Foru Aldundiak adierazia zuen AEK-ko BEZa ordaintzetik salbuetsia zegoela eta ez zela iruzurrik egon.

Azkenik, hil honen 5ean Baltasar Garzonek auto berri bat kaleratu zuen AEK-ren administrazio judizial osoa aginduz.

'EKIN AUZIA'

Natale Landari eta Xabier Arregiri bosna milioi pezetako bermea ezarri diete

Erredakzioa | DONOSTIA

Natale Landa abokatua atzo irten zen Soto del Realeko espetxetik. Espainiako Entzutegi Nazionaleko epaile Baltasar Garzonek deklarazioa hartu zion, *Ekin auziaren* barne, eta bost milioi pezetako bermea ezarri. Atzo ez zuen bermea ordaintzerik izan, banketxeak itxita zeudelako, baina aske utzi zuten, astelehenean ordaintzekotan.

Xabier Arregiri ere bost milioi pezetako bermea ezarri dio Garzonek, baina honek astelehena arte egon beharko du preso.

Arrasaten aurreko ostegunean egindako polizi operazioan atxilotu zuten Landa, eta, auzi horregatik epaileak aske utzi zuen arren, astelehenetik espetxeratuta egon da, *Ekin auziagatik*. Arregi, berriz, martxoaren 11n atxilotu zuten Bergaran.

Atxilotu gisa Landa espetxean legez kanpo eduki dutelako abokatuak salaketa jarri zuen atzo, Donostiako epaitegian. Berehala haren egoera aldatu zuen Entzutegi Nazionalek, preso gisa espetxeratuz, bermea ezarri aurretik.

EUSKAL PRESOK

Ander Mitxelena aske utzi dute 17 urteren buruan

Erredakzioa | DONOSTIA

Ander Mitxelena Berezi preso oartzuarra atzo irten zen Martuteneko espetxetik, 17:30ak aldera. 17 urte igaro ditu kartzelan, eta zigorraren hiru laurdenak 1999ko abenduan bete zituen. Espetxe ugaritan izan da urte hauetan, eta torturak ere jasan ditu: 1993an Valladolideko espetxera eramanez, Guardia Zibilaren esku.

Aitor Zubillaga legazpiarra ere espetxetik atzo irten zela iragarri zuten, haren senideek bost milioi pezetako bermea ordainduta. Baina beste auzi batean ere nahasita dagoela argudiatuta, Aranjuezen preso utzi dute.